

編號 5 號

【一頭大樣樹】詹陽期原作

佢个老屋有一甲个山，種滄各種各樣个果作，柑仔、檸檬係種來賣个，另外還有幾頭大梨、牛眼、荔枝、梅仔、杧仔、山楂、弓蕉這兜係種好搞个。

老屋起在半山排，係一條龍樣式个建築，對中央係廳下。屋面前有一條狹狹个山路，對山下彎彎幹幹開往上。路脣坎頂生有一頭當高大个土樣仔樹，大約有兩個大人手牽手恁粗，三、四棧樓恁高。聽阿爸講該頭樹仔對佢後生時節斯有，到今怕有四、五十年咧！

細細時節，見擺看著樣仔樹開花打子，想著過無幾久就做得食著該酸酸、甜甜又有醃醃香味个土樣仔咧，斯開始口水落落跌。佢兜三、四個叔伯兄弟旨到佢熟，就擎等竹篙撈打在當高个樣仔敲下來，一個人敲，其他人在路町拿網仔接。跌下來个總係比手巴掌較細隻又硬竹竹个青樣仔。撈樣仔皮刨忒，樣仔肉削薄薄搵豆油食，該味道實在湛斗。世大人長下笑佢兜講：「正經係烏鴉無隔夜卵，愁來毋掣食，旨曾旨抵斯敲敲下來，等到佢熟，驚怕伸無幾多咧！」

等到大熱天時節，歸樹滄滄青轉黃个土樣仔，在青天白雲个背景下，連同彎彎幹幹个山路，對山下遠遠看過去，斯像一幅油畫，靚到耐毋得。毋過，細人仔當豺，管佢靚毋靚，先落嘴正講。

敲樣仔係有孔竅个，細強仔力頭毋罅，輕又硬程个細竹篙盡好上手，還愛注意个係，驚怕會有難角蟲跌下來。還愛記得敲較細枝个樹桠，做毋得拓著樣仔。下背个人手腳愛溜掠，在樣仔落地泥下以前斯用網仔去接。

既經熟个樣仔蒂頭會流白白膏膏个奶，撈皮剝忒，果汁斯滲出來。遽遽歸隻送落嘴肚，用牙齒撈果肉喫下來，清香酸甜个果汁黏時流落喉嚨頭，就像在熱燻燻个天時跳落河壩搞水樣，透心涼。這斯係頭擺最好、最高級个零嗒，佢兜人豚仔一擺愛呷忒五、六隻正會過願。

毋過，十過年前，為著愛分貨車做得駛落山肚載貨，該條山路愛擱直拓寬。該頭樣仔樹閃毋過愛斬忒，該兩時歸屋下人當毋盼得。這下見擺對該條山路經過，總會回憶：「頭擺這位有一頭當高大个樣仔樹，樹下還有幾下個細強仔，嘻嘻哈哈拈蛇打蝎个身影。」

編號 6 號

【水版】李文煥原作

朋友對臺南帶來當有名个「麻豆碗版」，食个時節愛淋合好个甜辣醬，咬落去逐口都有絞肉摺鹹卵黃，食起來已有在地風味。毋過，佢心肝肚最愛个，還係俚客家个傳統美食——水版。該單純又虬个口感，分佢發夢都會尋味。該係佢童年个味緒，乜係家鄉个味緒，碗肚張等个毋單淨係水版，還係時光个影跡。

風定定仔吹過熟事个巷仔，水版微微个香氣，就像時光个送信仔，輕輕仔推醒牽覺个回憶。三十零年前，苗栗市个朝晨總會分一聲聲「水版哦！水版哦！」个聲喊醒。該係賣水版个阿姨嬌嬌个聲音，佢逐日會戴等笠嫲蒙等¹面帕，揸等淦淦兩籮个水版，行過莊頭巷尾滿哪仔去賣。佢單淨賣兩種口味个水版，一種係鹹个白水版，面頂鋪等切幼幼个韭菜、菜脯乾摺豆腐乾。另外一種係甜个紅水版，該係摺赤砂落去炊个，面頂麼个就無放，毋過該甜甜个味緒，顛倒係佢最好食个口味。

其實，水版不管係鹹个抑係甜个，一旦都係佢最好个米食。

做麼个佢會對水版恁合意呢？可能係在娘胎就造成个，識聽阿姆講佢大肚屎夯佢个時節，發子發到當嚴重，食麼个就嘔麼个，嘔到連膽汁斯殼出來²咧。阿爸為著阿姆夯人食毋落，一日一日落肉下去，愁慮到睬睬踏踏，毋知愛仰結煞正好。好得有一日，水版阿姨堵好揸擔經過喊：「水版哦！好食个水版哦！」阿爸心肝肚想：「甘願過錯，毋願錯過。水版雖然無麼个，但係有食總比無食較好。」煞煞就去買兩碗水版，賭彩看阿姆食得落無？

麼个山珍海味都食毋落个阿姆，看著水版嗶口水溶溶跌，兩下半斯拂到淨淨，全全無發子个現象。該日開始，阿姆就逐日等等水版阿姨，揸來正炊好萋萋个水版，一直食到摺佢降出來為止，所以頭擺佢還分人笑係「水版子」。

水版，毋單淨係一種食物，佢還係一段情感个載體。見擺佢食一口水版，就像係穿過時空，轉到該無愁慮个年代，轉到該阿姨个擔脣，轉到該溫情个屋下。在這隻緊板个生活裡肚，水版係佢心靈个安慰，係佢記憶中永遠个甜。

¹ 蒙等：音 miang den' / miang nen'；遮著。

² 殼出來：音 og chud loi；吐出來。